

ХАТТАМАСЫ

Атырау қаласы

22.05.2025 жыл

Өткізілген орны: «№7 Атырау қалалық емханасы» ШЖҚ КМК ғимараты
(мекен-жайы: Атырау қаласы, Бейбарыс даңғылы, құрылыс 39)

басталу уақыты: сағ: 15:00

аяқталу уақыты: сағ: 15:50

Төрағалық етті: Емхана директоры Г.Танбаева

Отырысқа қатысушылар саны: 51 емхана қызметкерлері

Күн тәртібі: Сыбайлас жемқорлық тәуекелдерінің алдын алу бойынша жүргізіліп жатырған ішкі талдау бойынша хабарлау және сыбайлас жемқорлық фактілерін болдырмау бағытындағы құқықтық түсіндіру жұмыстары.

Жиналыстың мақсаты:

- Сыбайлас жемқорлыққа қарсы құқықтық негіздер.
- Медицина саласындағы жемқорлық тәуекелдері.
- Алдын алу және құқықтық мәдениетті қалыптастыру.

Жиналыс барысы:

1.Жиналысты емхана директоры ашып, күн тәртібіндегі мәселеге тоқталды.

Емханада жүргізіліп жатырған ішкі талдау бойынша тоқталып өтті және жалпы жемқорлықпен күрес бағытындағы заңнама талаптары туралы сөз қозғалды.

2. Келесі сөз кезегінде емхана комплаенс офицері А.Кумарғалиева:

Құрметті емхана қызметкерлері! Бүгінгі таңда Қазақстан Республикасының дамуына кедергі келтіретін ең өзекті мәселелердің бірі — сыбайлас жемқорлық. Ол тек қана экономикалық емес, сонымен қатар әлеуметтік және моральдық салаларға да кері әсерін тигізеді. Медицина саласында орын алатын сыбайлас жемқорлық қоғамның ең әлсіз топтарының — науқастар мен олардың туыстарының құқықтары мен сеніміне нұқсан келтіреді. Қазақстан Республикасы төмендегі негізгі заңнамалық актілер арқылы сыбайлас жемқорлыққа қарсы күрес жүргізуде:

- Қазақстан Республикасының Конституциясы (1995 ж.): Әр азаматтың тең құқылы екендігін және заң алдында жауапты екенін бекітеді.
- «Сыбайлас жемқорлыққа қарсы іс-қимыл туралы» ҚР Заңы (18.11.2015 ж.): Сыбайлас жемқорлықтың алдын алу, анықтау, жолын кесу, әшкерелеу және оның салдарын жоюға бағытталған құқықтық негіздерді айқындайды.
- ҚР Қылмыстық кодексі (2014 ж.): Сыбайлас жемқорлық құқық бұзушылықтар үшін нақты жауапкершілік көзделген (ҚР ҚК 366-бап — пара алу, 367-бап — пара беру және т.б.).

• ҚР Мемлекеттік қызмет істері және сыбайлас жемқорлыққа қарсы іс-қимыл агенттігінің бұйрықтары.

• ҚР Денсаулық сақтау министрінің бұйрықтары (мысалы, №ҚР ДСМ-34/2020 — медицина қызметкерлерінің этикасы мен тәртібі туралы ережелер).

Медицина мекемелеріндегі жемқорлық тәуекелдеріне мыналар жатады:

- Ақылы қызмет көрсету мен тегін медициналық көмек шектерін бұрмалау;
- Қызмет көрсетуде артықшылық жасау үшін сыйақы талап ету;
- Мемлекеттік сатып алуларда заңбұзушылықтар;
- Мүгедектік, уақытша еңбекке жарамсыздық парақтарын заңсыз беру;
- Қызметкерлерді жұмысқа орналастыру мен кадрлық шешімдерде парақорлық.

Сыбайлас жемқорлыққа жол бермеу үшін келесі шараларды ұсынуға болады:

- Ішкі бақылау жүйесін жетілдіру: Әрбір бөлімде жемқорлық тәуекелдерін бағалау және есеп беру жүйесін енгізу.
- Ашықтық пен есептілік: Пациенттерге көрсетілетін қызметтің тізімі мен бағаларын емхана қабырғаларына, сайтқа ашық түрде орналастыру.
- Этикалық кодексті сақтау: ҚР ДСМ бұйрығы негізінде әзірленген медицина қызметкерінің этикалық кодексін күнделікті қызметте ұстану.
- Тұрақты құқықтық түсіндіру жұмыстары: Медицина қызметкерлеріне сыбайлас жемқорлыққа қарсы заңнаманы үнемі түсіндіру, тренингтер мен семинарлар өткізу.
- Сенім телефондары мен жәшіктері: Пациенттер мен қызметкерлерге өз құқықтарын қорғау мүмкіндігін беру.

Құрметті әріптестер!

Сыбайлас жемқорлық — тек құқық бұзушылық емес, бұл қоғамға деген сенімсіздік. Әрбір медицина қызметкерінің адалдығы мен жауапкершілігі — халық денсаулығы мен ел болашағының кепілі. Осы орайда әрқайсымыз жемқорлықтың алдын алу ісіне үлес қосуымыз керек. Естеріңізде болсын: заңды білмеу жауапкершіліктен босатпайды, ал заңды сақтау — әрбіріміздің азаматтық борышымыз. Назарларыңызға рахмет!

Қорытынды:

Жиналыс барысында сыбайлас жемқорлықтың алдын алу бойынша бірқатар маңызды мәселелерге тоқталынды. Алдағы уақытта осы мәселелер бойынша және ішкі талдау бойынша қорытынды хабарланады, нақты шаралар қабылданады.

Төрайым:  Г.А.Танбаева

Хатшы:  А.Кумаргалиева